



PEMERINTAH KABUPATEN KARANGASEM

DESA PEKRAMAN BUKIT CATU

PERBEKELAN SELUMBUNG

Kecamatan Manggis, Kabupaten Karangasem

Alamat : Jln Raya Bukit Catu, Manggis, Karangasem (80871)

AWIG-AWIG

DESA PAKRAMAN BUKIT CATU

PERBEKELAN SELUMBUNG

KECAMATAN MANGGIS

KABUPATEN KARANGASEM

SUKERTA TATA AGAMA

PALET I

PAWOS 1 :

INDIK DEWA YADNYA

INDIK KAHYANGAN

1. Pura Puseh , Pura Bale Agung , Pura Dalem , Pura Pesimpenan , Pura Segehe , Pura Tanggun Desa , Pura Beji , sane kadruasa antuk Desa , indik pengaci-aci manut kula dresta kalih peswaran Desa Pakraman Bukit Catu.
2. Pura-Pura Kahyangan sane ring sane kauçap ring kayun , papayon kalih pengaci-aci ka emponin antuk Krama Dadia Pura, Sane nyungsung Bhatara ring Pura Dadia punika soang-soang.
3. Mungguing Pura Beji (Mumbul) , papayon kalih pengaci-aci ka emponin antuk Krama Desa Pakraman Bukit Catu.
4. Yan wenten kerecehan , wicara , sajeroning Banjar , pangempon Pura Kahyangan , wenang ka tengahang ka Desa , Prajuru Desa mawosin , nyahsahang , nepasin wicarane , mangda kasidan mawali landuh jatimula.
5. Yan wenten Pura Kahyangan sinalih tunggil pengaci-acinya kantos ka dasa warsan , yoga Prajuru Desa mamawosin , maritetes ngutsahayang mangda kasidan mawali kadi jati mula , nanging prade tan kasidan mawali kadi jati mula , majalaran antuk pamutus paruman Desa ngewangunan pangupacara mralina pura punika, mangda tan keranjingan / kaumahin antuk Ki Bhuta Kubanda

PAWOS 2 :

INDIK PANGACI-ACI

1. Indik pangaci-aci ring Pura Kahyangan sane wenten sajeroning wewengkon Desa Pakraman Bukit Catu , ke amongin antuk Krama Desa lan Banjar Pakraman Bukit Catu.
2. Sane yoga muput aci-aci ring Pura Kahyangan sane kadruwe antuk Desa Pakraman Bukit Catu , Ida Sang Maangga Sulinggih saneantuk Krama Desa.
3. Yan wenten sinalih tunggil Pura durung maduwe Pemangku , utawi Pemangkune . kapialang , dados nuur sinalih tunggil Pemangku

Kahyangan Desa , prade taler tan mrasidayang petut nuur Ida Maangga Sulinggih sane antuk Krama Desa.

4. Pemangku Desa , punika wantah Pemangku Pura Puseh, Pura Bale Agung , Pur Pasimpenan , Pura Dalem , Pura Prajapati , Pura , Pura Tanggun Desa , Pura Beji . Pura sane keempon antuk Desa sane wenten sajeroning Desa Pakraman Bukit Catu kalugra nganteb banten pengodal minakadi sane ring Pura-Pura.
5. Ritatkala Desa ngewangun Karya Gentuh Bhatara Turun Kabeh , minakadi Karya Agung sawosan , Desa dados narad pemangku-pemangku Dadia pacang ngarombo Pemangku Desa.

PAWOS 3 :

1. Indik pangaci-aci Pura Pamrajan , Paibon , Dadia , punika ke.... antuk Krama Desa sajeroning Dadia , Pamrajan , manut Sima Drestanya sowang-sowang tan singsal ring ucaping sastra Agama Hindu.

PAWOS 4 :

ACI-ACI , PIODALAN , USABA , PASEGEH RING KAHYANGAN , LUWIRE :

1. Pura Puseh Bukit Catu Ring Rahina Purnamaning sasih Kapat utawi sasih Kalima kesinanggeh Ngusaba , lan ring rahina Budha Kliwon Pagerwesi kesinanggeh Pengodal.
2. Pura Bale Agung sanunggil Purnama Kapat utawi Purnama Kalima.
3. Pur Dalem : Ring Tileming sasih Kadasa kesinanggeh Pengaci , lan ring Budha Wage Klawu kesinanggeh pengodal.
4. Pura Prajapati Bukit Catu : Ring Tilem sasih Kadasa kesinanggeh Pengodal.
5. Pura Pucak Sari : ring Purnama sasih Kapat utawi Purnama Kelima , kesinanggeh Pengacian.
6. Catur Pata / Pempatan Agung ring Kajeng Kliwon sasih Karo kasinanggeh Pesegehan.
7. Pura Tanggun Desa ring Tilem sasih Karo.
8. Pura Beji : ring Tilem sasih Karo.

PAWOS 5 :

1. Ritatkala kabrebehang jagate kageringan katiben Panca Bhaya , pinang tan mrasidyang ngaturang Aci kadi patute , yogya Prajuru Desa miwah Pemangku, ngaturang piuning ring Bhatara, masadana bebanten , pedhatengan , percanangan. Maka cihna tan pegat aci-acine , ri wus mawali degdeg jagate patut ngawangunang Upacara Bhatara Turun Kabeh masasirih ,lunga ka Segara.
2. Yan ritatkala ngayum papayon ring Pura-Pura Kahyangan pinangan tan puput kala dinaning piodalan , pengacine wenang rangkadang , nanghing pedathengan , pecanangan ,ten dados pegatang , ri wus puput masesapuh salwire , malih mawali kadi kuno.

KAPING 3

INDIK PEMANGKU

PAWOS 6 :

1. Pidabdab ngadegang pemangku luire:
Ha : Ngambil saking saserod santana wiadin katurunan.
Na : Saking pawuwus sasambatan , wiadin nyanjan.
Ca : Sangkaning kajujuh saha kabriyukin antuk krama Desa Pakraman Bukit Catu.
2. Sane tan wenang keadegang dados pemangku:
Ha : Cedangga luwire : peceng , perot , cungh , lan sapanunggil ipun.
Na : Mabukti sungkan .
Ca : Mabukti nahen malaksane corah.
3. Sang sapa sira hugi pinaka jan banggul , pamangku ring Pura Puseh Bukit Catu minakadi ring Pura Kahyangan sajeroning Desa Bukit Catu mangda pageh ngamel kalih nglaksanayang sasanan pemangku.
4. Sang sapa sira hugi krama Desa , sangkaning saserodan , sangkaning sasenengan antuk Bhatara polih pawuwus ring sasemburan , minakadi kajujuh kabriukin antuk krama Desa , pacang kaanggen pemangku , yan kari alakirabi yogya lanang istri mawinten.

5. Sang kasudi pacang kaanggen pemangku ,patut mawinten ring pura genahe dados pemangku ,mungguhing prabeya ,yan pemangku Desa kasandang antuk krama Desa.

6. Petias utawi olih-olihan pemangku Desa luire:

Ha : Luput ayahan ,urunan miwah wawedalan ring Desa , Banjar

Ca : Patias siosan manut pararem Desa

7. Pemangku kagentosin majalaran antuk :

Ha : Mapinunas mararian,saking patut pinunase nanging tan kari nglaksanayang dharmaning pemangku kawekas kalaning seda tan polih patulung prabheya atitiwa.

Ca : Sangkaning kausanang ,majalaran antuk laksanane mamurug sasanan pemangku,kawekas kalaning seda tan polih patulung prabeya atitiwa.

Ka : Yan wenten jero mangku desa lanang wiadin istri katibenin kalampusang (padem) Krama Desa patute ngewentenang prabeya minakadi: 100kg beras,50 butir kelapa,60 butir adeng,1 pis kasa.

8.Swedharmaning Pemangku :

HA : Nitenin Nuntun Kesucian.

Ca : Ngenterang Upacara/Upakara Piodalan Kahyangan Desa, miwah pawukon

Soang-soang Krama Desa.

Ra : Ngaturang Penauran sinalih tunggil krama desa utawi krama dura desa.

2. Sang mapenauran patut mesadok ring para Yogya mangda kalikitayang tur kaunggahang druwene :

Ha ; Penauran upacara lan wewalen.

Na : Penauran leluwes , mule-mule.

Ca : Sesari.

- Ra : Sabinaning penauran pejati Lsp , sane mawali kelungsur kengin kapuputang antuk pemangku kemaon.
3. Ngenterang Yadnya madia , bilih-bilih utama, kengin mangda nuur Ida Pedanda pacang muputang piodalan inucap, lan Pemangku pinaka penyangra.
 4. Sane dados ngewakilin Pemangku Puseh, Pemangku Dalem/ Kahyangan Tiga inggih punika Kelian Desa.
 5. Rikala Pemangku pacang ngenterang indik piodalan ring Kahyangan Desa mapengangge sarwa petak.
 6. Rikala Usaba Puseh kawentenang Tabuh Rah sane kabawos nyuwung, sausan Tabuh Rah ten kadadosang kantong wenten pecak runtutan tabuh rah/ mangda sampun bersih.

KAPING 4

INDIK KASUKRETANING PURA KAHYANGAN

Pawos 8 :

1. Rikalaning maturan among pemangku ring Kahyangan punika sane dados munggah tedun ring pelinggih-pelinggih kahyangan inucap, minakadi sang sampun polih lugraha saking Prajuru Desa. Indik wewengan ring Brahmana kedadosang maturan ngeraga, sakewanten wewengan ring jero mekel nenten kedadosang maturan ngeraga, sejabaning sampun mawinten ka Kahyangan Tiga.
2. Tan kalugra masumpah, macoran, sajeroning pura kahyangan sinalih tunggil sajaba sangkaning wicara pura inucap, taler saking pabuat krama Desa, utawi krama Pemaksan sane ngempon pura punika.
3. Tan kalugra wak capala, hasta capala, pada capala, miwah sapanunggilan ipun, sajeroning pura kahyangan, yan macihna minakadi wenten mamurug wenten raris ngatehang ka Desa yogya katiwakang danda manut pamutus perarem desa, saha pamarisudan Kahyangan.

4. Sang sapesira ugi kacuntakan, saluwiring cuntaka yan durung mabersih, tan kalugra ngeranjing ka Pura Kahyangan, yan katenger wenten mamurug, yogya tiniwakin danda marisudha Kahyangan punika.
5. Sedahan ngengengan miwah sapanunggilanipun tan kalugra masehe ring pura kahyangan sinalih tunggil sejaba nyanjan Pemangku. Yan wenten mamurug, yogya danda gung arha manut pawsara, ngawangdeang maseha.
6. Tan kalugra ngawentenang jajuden, klecan ring sajeroning suter karang pura kahyangan desa pekraman Bukit Catu, sajaning tabuh Rah.
7. Tan kalugra makta saluwiring sane kasinanggeh tan suci ngranjing ka sajroning suter pura kahyangan, yan wenten amurug, yogya sang amurug marisudha pura punika.
8. Sang sapesira ugi rikalaning makemit ring pura kahyangan, yan merem, tan kalugra madukan lanang istri, sajaba anak sane kapineh kantun alit, durung demaja putra, yan mamurug keni dandha manut pangargan beras adasa kilo gram sa diri, tur mrayascita pura punika.
9. Pratingkahe sane tan patut utawi tan manut luwira :
Ha : Mundut utawi nyunggi ring bahu kiri.
Na : Nyungklit keris ring kiwa.
10. Yan wenten macihna anak wyadin sang bsapa sira ugi, katedunan utawi kapanggluh sajroning pura kahyangan sawawengkoning desa pakraman Bukit Catu, mababawos minangkenang pangandikan Ida Ratu Sasuhunan, utawi Bhatara, ri gelis tunasang Tirtha laluputan mangda gelis hudep. Prade sampun kaketisin tirtha kantun ngetemel masira masero ngawetuang sumandeya kayun kramane, irika patut pintonin ambilang toya apane, celebang tangane makekalih, yan mabukti tan belus, nyandang gega pangandikan Bhatara. Yan prade belus, ten nyandang gega. Gelisang gingsirang genahang mangda doh saking pura punika.
11. Tan kapatutang nyolahang ilen-ilen utawi balih – balihan ring pura yan tan manut tatujon pidabdab ring pura inucap.

INDIK CUNTAKA MIWAH SOSOT

Pawos 9 :

1.Sang sapisira ugi Krama Desa sane kahanan cuntaka, tan wenang ngeranjing ka Pura Kahyangan, ka panyucian kalaning nyuci ngening, minakadi ring salwirang genah sane kaucap suci pingit. Tan wenang ngaryanin saji salwiring saji sane pacang katur ka Sanggar Tawang, sakadi suci gening, minakadi banten sane jaga katurka pura, miwah sane katur ring pitra pindha, mungguing banten sane pacang katur ka Prajapati ,Dalem, pangulun setra dados kakaryanin ring umah sang cuntaka, kalaning mangupacara sawa.

2.Luwir sane inucap cuntaka

Ha . Anak istri kalaning ngraja sewala, swen cuntaka saking ngawit ngraja sewala kantos usan. Macihna sampun malukat.

Na . Yan sang nganten lanang istri, suwene cuntaka, ngawit saking raina pengantenane, wiadin rahina merangkate ngantos puput mabea kawon, masamayut prayascita, malukat matirtha.

Ca . Krama sane cuntaka sangkaning maduwe oka, lanang istri cuntaka. Suwene cuntaka, sane istri petang dasa kalih rahina, saking wawu embas . Lanangne solas rahina. Sampun matirtha malukat.

Ra . Anak istri karuron, pateh cuntakane ring anak ngembasang oka.

3.Cuntaka melarapan antuk kasedayan, kapatyan.

Ha. Yan sang ngarepang, minakadi sang magenah ring sajeroning karang paumahan sang seda, suwene cuntaka kantos puput ngarebonin, pinih sor tigang rahina saking puput karyane. Macihna yan punah cuntakane antuk marerebu.

Na. Sang polih ngarap sawa,ngambel saha ngarumbat sa eteh – eteh upacara pula paling sawa, cuntaka adina, kacihnayang antuk malukat.

Ca. Yan sang manjing mijil ring umah sang ngraksa sawa, sasuwen sawa wyadin layone keraksa, peteh cuntakane kadi sang ngarepang sawa ika.

Ra. Yan manjing mijil ring umah sang ngraksa sawa, wyadin layon sangkaning aninjo, punah cuntakane sesampun masiram saha matirtha.

Ka. Sebel karang dados margiang saking ngawit ngawit negtegang dagung kantos Ida masineb, wewanengan sebel karang hamung ring sang magenah sajroning karang sane kacuntakan. Yan wenten seda dados ngemargiang sebel karang patut pendem makingsan kalaning sandi kala, nanging tan polih swaran kulkul.

4. Cuntaka sangkaning melaksana mamitra ngalang, suwene cuntaka salami mamitra ngalang.
5. Anak embas sangkaning semara dudu, utawi tan mawidhi widhana pawiwahan, babinjat punika taler cuntaka, suwene cuntaka salami durung wenten meras, utawi nganggen dadaman, sadurung kalaksanayang upakara, nenten dados ngeranjing ka pura kahyangan tiga teler ibunnia.
6. Cuntaka sangkaning mabukti madrebe pinyungkan sane tan sida waras selamine, kadi halaning ila, buduh, ngawinang reged saking silit, bhaga, purus tan henep mameres, berung borok tahunan, miwah saluwir punika, suwene cuntaka selami tan waras. Mangdena sang maduwe anak buduh punika patut nulenga.
7. Yan wenten sinalih tunggil krama desa durung tutug cuntaka kadi ucaping ring arep mamurug larangan, yan wenten ngatengahang ka desa, prajuru desa niwakang pamidanda, yoga sang mamurug sakabwatan manut pangloktika.
8. Rikalaning krama desa tedun makarya, sang kacuntakan tan keni ayahan.
9. Yan wenten silih sinunggil krama desa kacuntakan antuk nraksa sawa, wyadin layon napkala pagilih pagentosan ngaci- aci ring sinalih tunggil pura kahyangan desa, pacaruan ring desa sadurung tutug sengker cuntakannia wenang tan tedun mayahan, tan dinosan, nanging yan wenten pisadok sang cuntaka ring prajuru desa, yan wus tutug cuntakannia patut neregteg yan kari ngelantur patedunane mungguhing paturunan, wawijilan daging saluwiripun sami mapanukar antuk jinah manut pangarga.

10. Yan cuntaka ganya gamana, prajuru desa ngantosang pamutus sang angawa Rat, yan sampun wenten pamutus saking sang angawa bumi ring desa katiwakan danda kadi ring sor puniki, luwire: mangda marastista raga, genah melaksana, kahyangan desa, miwah desa pakraman. Prade sang katiwakan pamidanda memandal kabawos di desa, kicen pamutus antuk prajuru desa, manut pamutus pararem desa.
11. Cuntaka sangkaning mabukti salah timpal, cuntaka ragan sang melaksana, miwah desa pagenahannia, tutug cuntakane yan sampun sang melaksana mrayascita panangaskara raga, genah melaksana, desane mrayascita desa, buron sane kangge somah, ka pademang tur katanem.
12. Anak istri beling tan kapariangken antuk lanangne, suwene cuntaka kantos wenten pangupakara pangaskaran kula wisudha, anake istri beling mawidi widana pawiwahan masanding keris pinaka ragan sang kadalih tur upakara punika kesaksinin ring krama desa/ prajuru desa makasami.
13. Anak istri beling tan kapariangken, suwene kantos lekad rarene, saha wenten pangupakara kula wisudha.
14. Yan wenten anak, mabukti nyolong semara, cuntaka pateh ring cuntaka gamia gamana.

Pawos 10 :

1. Indik sosot :

- Ha. Yan wenten sinalih tunggil pacang naur sosot wiyadin sesangi, salwiring sewsangi, gumanti sane patut nganggen pamegat sot, ten dados nahur sot yan tan kalaning dina piodalan Bhatara, nigang dinayang aci, sang pacang nahur sesangi patut samput masadok ring pemangku pura, yan ring kahyangan desa penahurane, patut masadok ring prajuru desa, penahuran sesangi punika, wawu kapuput antuk pemangku, kasaksinin antuk prajuru desa.
- Na. Yan wenten sinalih tunggil nahur sesangi pacang ngaturang pangodal utawi pangusabaan, ugi mangda ring dina pangantos piodalane. Sang nahur sesangi, wenang nunas kanti patulung karya ring krama desa. Yadiastu sampun wenten anak ngaturang sesangi pangodal, krama desa tetep ngaturang pangodal ring pura inucap.

Ca. Yan wenten sinalih tunggil nahur sesangi maturan swaran tangguran salwiring tetabuhan, sasolahan mina kadi salwir ipun, mungging prabeya punika sami kaangganin antuk sang masesangi. Sakewanten sang ngaturang sesangi dados sausan acara desa.

2.Haturan.

Yan wenten sang sapepira ugi ngaturang jinah muah sarupaning barang, punika sami patut kahuna dikayang antuk prajuru desa.

3.Sesarin canang

Sesamput puput pangaci-aci puja waline, sesarin canang punika kapupulang saha kawilangin antuk prajuru desa, pamangku desa, indik tatiwak kalih pamargin ipun nganutang sekadi perarem desa.

Pawos 11 :

1. Awig- awig sajroning muspa.

Muspa wiyadin maturan ring pura kahyangan desa yening sampun kramane/ sametone sayaga muspa/ ngaturang bhakti, patut krama sane rauh pungkuran mangdene ngantos abos-bos ngantos pabaktiyane wusan, tur jero mangku tan kalugra ngaturang aturan kramane sane wawu rauh.

2Yan wenten pacang ngawentenang ilen- ilen nenten dados nyolahang ilen- ilen minakadi joged , film lan selantur ipun, sane tan wenten tatujon nyane ring pidabdab upacara ring pura.

3.Rikala upacara-upacara ring kahyangan desa sausan ngaturang bhakti tan kalugra matangi yan durung wenten panganikan saking para yogya.

INDIK RESI YADNYA.

Pawos kaping 12:

1. Mungging beji, pepayon pangacin – acin nia kahempon antuk Banjar Bukit Catu.
2. Yan wenten karecehan, wicara sajroning banjar, pangempon pura kahyangan, paibon sekeha-sekeha sinalih tunggil, wenang katengahang ka desa, prajuru desa mamawosin, nyahsahang, nepasin wicarane, mangde kasidan mawali landuh jati mula.
3. Yan wenten pura kahyangan sinalih tunggil, heneng pangaci- acine kantos kadasa warsa, yoga prajuru mamawosin, mari tetes ngutsahayang mangda kasidan jati mula, nanging prade tan kasidan, majalaran antuk pamutus paruman desa prasida desa ngawangunang pangupacara mralina pura punika, mangde tan karanjinging/ ka umahin antuk bhuta kubandha.

INDIK PANGACI- ACI

1. Sane yoga muput pangaci-aci ring pura kahyangan sane kadruwe antuk Desa ping ajeng ring sang kasinanggeh sang Guru Loka
2. Kalaning dewasa ayu, wenang desa ngaturang punya miwah Rsi Bojana ring Ida sang maangga Sulinggih, taler kalaning karya utama ring Desa, saluiring karya sane kaputus antuk Ida sang maangga sulinggih patut ngaturang puja. Asapunika taler ring sang mapitulung patut maweh Dana.
3. Sang sapisira hugi krama desa pakraman Bukit Catu, yan mapekayun pacang matelah-telah, mawinten mapodgala taler mangda wenten pasadik pamihuning ring prajuru desa, sajaba patut polih palugrahan saking guru wisesa.

PALET 3

INDIK PITRA YADNYA

PAWOS 13 :

1. Pamargi upakara Sawa ,hugi manut linggih sastra agama Hindu wenten akudang-kudang soroh:

Ha : Mapendem ring pertiwi

Na : Makinsan ring geni

Ca : Atiwa-tiwa utawi pelebon / Ngaben

2. Sang sapasira hugi Krama Desa Bukit Catu tan kuasa ika sampun keni pangupakara sawa,yan wenten mamurug , yogya katiwakan dandha ,Mrayascita ,Marisudha Desa.
3. Salwiring upacara atiwa-tiwa,palebon,ngaben ring setra hugi kawenanganya,tan wenang ring desa pakraman ,sejaba malebonang puspan Ida Sulinggih ,Yan wenten manurug wenang dendha marisudha desa ,krama desa sang atukung dendha gung artha manut pamutus pararem Desa.
4. Tan wenang nekeh sawa yan tan macamana ,mabersih, lintangan ringvroras dina ,ngawit saking dinane seda ,yan wentren mamurug Dendha gung artha ,manut pamutus perarem desa saha mrayascitha Desa.
5. yan wenten krama wed Bukit Catu magenah ring rantauan ,sampun masuk desa pakraman ring luar ,yan warga punika maduwe ke pademan tur baktana ka Desa Bukit Catu .Krama punika keni 50 kg beras lan polih pada duman banjar .ampunang nanem/morbor yan langsung ngaben keni 250 kg .
6. Yan wenten krama wed Bukit Catu ,magenah ring rantauan ,tur sampun masuk krama irika jagi nglaksanayang upacara ngaben ring Bukit Catu keni panyandang wantah . .25 kg beras manjing ka banjar 24.kg/sawa.Termasuk ngeroras.
7. Yening ngraksa sawa utawi layon lintangan ring kalih rahina , layon punika patut katureksain mangda nenten mambu kawon.

8. Sang sapa sira ugi tan wenang nginepang utawi ngawangdeang bangbang ring setra desa pakraman Bukit Catu, yan wenten mamurug kadanda manut pamutus perarem desa, bangbang inucap patut kaurug ssaha maweweh panangaskara.
9. Sang sapa sira krama desa pakraman Bukit Catu tan wenang atiwa- tiwa rikalaning pangaci desa lwire : patirtaan , patoyan ring pura kahyangan desa, ring pura dadia utawi paibon – paibon, Ida Bhatara turun kabeh, tabuh gentuh, mina kadi karya agung siosan. Yan wenten kalayuan rikala punika, krama sane maduwe kalayuan mangdene nyantos sausan ngelebar Ida Bhatara tirta utawi piodalan punika sampun masineb. Yan wenten mamurug, keni danda mrayascita desa, mina kadi krama sane matulung danda gung arta manut pamutus paraem desa.
10. Yan wenten krama mendem sawa kalaning dina larangan, kawasa , nanging hugi masawen, durung masusun bintang, tur mabungbungin laku makingsan , mungginging dauh kadadosang wantah nincap sandi kala, patedunan banjar polih nanging tan nyuaraang gendongan, tigang rahina sausan ngarya gagumuk wawu dados mratista.

11. Indik padewasan

Ha. Padewasan mendem ring pratiwi, makingsan ring geni wenang katiwakan antuk kelian desa wiadin pemangku dalem manut pasubaya.

Na. Padewasan atiwa-tiwa, katiwakang antuk Ida sang mangga Sulinggih sane pacang muput, yogya sampun kapatut antuk prajuru desa.

Ca. Indik larangan ngupacara sawa sajaba ngunggahang ka tumpang salu, sane kamanggehang ring sajroning desa pakraman Bukit Catu, lwire : Budha pon, Budha wage, Budha kliwon, saniscara kliwon, anggara kliwon, redite umanis, sukra pon, saniscara wage, redite kliwon ika semut sadulur, miwah yan panca wara sareng sapta wara urip ipun 13 miwh 14, sukra kliwon, saniscara umanis, redite pahing, ika kala gotongan, miwah ring tanggal pangelong ping 15, tanggal pangelong ping 14, miwah tanggal pangelong ping 1.

Ra. Yan wenten krama sane maduwe rabi tan palapor ka Desa turmaning sampun maduwe pianak lan pianak ipune padem , pacang kalungahang , punika keni danda tanpa laporan lan keni penyandang ngelungah 5 kg beras.

Ka. Tan wenang ngutang ngirim, teges ipun sajroning setra nunggil, yan wenten ngirim tan dados sane siosan mendem sawa, minakadi atiwa-tiwa ngaben ring dina punika. Yan wenten kapademan lan pengabenan mangda hugi ngawentenang waneng arahina (nenten dados ngerahina mendem).

Da. Yan wenten mendem sawa utawi makingsan, ring geni, langkungan sawane ring asiki, sajroning setra Bukit Catu, yogya pamargine ka setra sinarengan katuntun antuk prajuru desa.

Ta. Yan mersihin sawa anak sane pacang kaabenang kengin kamargiang ring karang pumahan krama inucap.

Sa. Yan wenten krama tamyu sane maagama Hindu pacang ngamargiyang upakiara atiwa-tiwa ring desa pakraman Bukit Catu yogya matur supeksa ring prajuru desa. Yan sampun polih panugrahan patut nahur pangresik setra manut pamutus pararem desa wantah 300 kg beras. Tan polih tedunan banjar/ desa.

Wa . Rikala wenten ngelaksanayang pengabenan ring desa pakraman Bukit Catu, yan wenten krama pacang ngeseng sawa, mendem sawa, sajroning rahina punika taler kalugra nanging mangda sinarengan.

La . Yan wenten sawa tan kapariangken, ring wawengkon desa pakraman Bukit Catu, ngaran babedag desa, yogya prajuru desa ngundukang krama desa mendem setra pangilang – ilangan utawi stra teben, sasampun polih lugraha saking sang angawa rat, kicen bubuh pirata saking desa.

Ma . Yan wenten anak istri ngadut manik seda utawi lampus, wenang kapendem utawi kageseng, nanging karban nia katetehin antuk batu, saha manik nia kagentosin antuk kelungah nyuh gading tur kaupacarain kadi patutne.

Ga . Yan wenten sinalih tunggil sawa, genahe seda wiadin padem sajabaning karang pumahan, luwire ring tegal, pura, pasar, banjar sekolah miwah genah sane siosan dudu karang pumahan yogya sang maduwe wirange mrayascita , marisudha genah punika. Yan sawa tan kaparihangkenan, genah punika patut kaparisudha antuk sang maduwe hemponan.

Ba . Indik panyanggra ritatkalaning ngalaksanayang upacara pitra yadnya pamargin ipun kaunggang sajroning paswara, pasubaya banjar, dadya nganutin soang –soang.

vos 14 :

INDIK ANGATMA WEDANA.

1. Sang sapa sira hugi krama desa Bukit Catu yan kalaning ngatma wedana lwire : ngroras , patileman, baligya, tan wenang ngawangunang payadnyan , petak, ring palemahan pura kahyangan desa, minakadi kahyangan siyosan.

PALET 4

INDIK MANUSA YADNYA

1. Sang sapa sira hugi krama desa Bukit Catu, ngawangun salwiring upacara manusa yadnya tan wenag magenah ring wawidangan palemahan kahyangan panyiwian desa, yan wenten sinalih tunggil mamurug, wenang danda gung artha manut pamutus pararem desa, saha mrayascita marisudha pura punika.
2. Sane kalugra mawinten magenah ring pura sinalih tunggil, sang sapa sira hugi krama desa sane pacang kaadegang dados pemangku ring pura kahyangan inucap, taler sane kaadegang prajuru desa, wenang mawinten, majaya-jaya ring pura desa Bukit Catu.
3. Indik manusa yadnya sane dados kamargiang sajroning desa pakraman Bukit Catu hugi sane nganutin dresta kuna minakadi sastra agama.

PALET 5

INDIK BHUTA YADNYA

vos 15 :

1. Sajroning desa pakraman Bukit Catu, pecaruan manut hungguhan, kalih sor singgih lwire :
 - Ha. Pecaruan desa sane kawangunang sada kala, manut gegaduhan pura, banjar, pahuman minakadi dadia soang-soang.
 - Na. Pacaruan desa rikala jagate ka brebehan, kageringan, kadurmangalan, katiben panca bhaya, miwah sane siosan sane patut carunin.
 - Ca . Agung alit caru, manut hungguan caru, babuatan pacaruan kalih nista madya utamaning caru.
2. Pecaruan ring pura kahyangan, Dadya salwire manut drestan soang-soang minakadi awig-awig gagaduhan pura inucap.
3. Yan sanalih tunggil pura kahyangan,heneng salwire, pacaruan kantos tigang plabuh, wenang prajuru desa mamaosin, Yan wus puput babawose, yoga maguru piduka, ngawit masesapuh mangda kasidan ngaturang pangaci-aci.
4. Caru balik sumpah kalaning tilem kesanga, ring pempatan desa, manut sastra dresta, kalanturang antuk bratha panyepian.
5. Rikalaning ngalaksanayang bratha panyepian,krama ngamargiyang ring jero soang-soang. Prade wenten kapanca bhaya utawi kabuwatan patut digelis matur supeksa ring prajuru desa minakadi ring pecalang desa.
6. Upacara panyepian , nganutin catur bratha panyepian , luwir ipun:
 - Ha. Amati geni: Tan kenginan mapi-api sajabaning :
 1. Sang maduwe rare, durung tigang rahina, ring genah
 2. Sang matepetin anak sungkan ring genah sang sungkan.
 3. Sang maduwe layon ring genah inucap.
 - Na. Amati karia : Tan kenginan nyambut karia .

Ca. Amati lelungaan : Tan kenginan malelungaan sajawaning sang polih panugrahan saking prajuru desa.

Ra. Amati lelungan ; Tan kenginan maoneng -onengan, maswara ngora lan sapanunggilan ipun.

7. Pabratan inucap kamargiang saking semeng jam 06.00wita ngantos semeng benjangne, matengeran antuk suaran gendongan, yan wenten murug, keni pamidanda manut pararem desa.
8. Ri wus rahina nyepi, benjangne ngembak geni, patut soang-soang krama sami ngaksama ring kadangnia utawi ngawentenang dharma santhi.

SAT SARGAH

SUKERTA TATA PAWONGAN

PALET 1.

INDIK RANGKAT.

PAWOS 16 :

1. Indik rangkat punika, manut desa kala patra, mwanng sima dresta, sane kapatutang tur katinutin antuk krama desa soang-soang tan singsal ring uger-uger panegara luwire :

Ha. Papadikan.

Na. Marangkat utawi ngarorod.

Ca. Nyeburin utawi kabawos nyentana, sadurung kaupa saksiang ring prajuru desa,patut katimbangang ring kadang warga. Ri sampune sami adung tur sami satuju, wau kaupa saksiang saha kapitegepin upacara pamerasan.

2. Pidabdab sang marabian patut :

Ha. Manut yusa lan manut kecaping agama Hindu.

Na. Sangkaning pada rena, utawi tan kapaksa.

Ca. Prade pacang ngerangkatang, sios agama, patut ngamargiang upacara Sudhi Wadani sasampun likita saking sang nawa rat.

3. Mungging tata cara rangkat minakadi pawiwahan kaunggang sajeroning pararem desa.
4. Sajroning desa pakraman Bukit Catu indik rangkat punika yan sampun mawidi widana pawiwahan tur malukat kasaksinin antuk tri upa saksi : manusa saksi, bhuta saksi, miwah dewa saksi. Rangkat punika sampun kasinanggeh parikrama.
5. Yan wenten krama sane mrangkat kaping kalih, lan nenten wenten pisadok ka prajuru desa, rangkat punika nenten sah (Utawi istri sane kaping kalih nenten sah).
6. Yan wenten anak istri krama desa pakraman Bukit Catu karangkatang antuk sang sapepira ugi, napi malih antuk sang saking dura desa, yan kantos arahina ring awengi saking rahina matilare saking jumlah tan wenten pejati, yoga sang maduwe wirange nunas kanti ring prajuru desa, mangda ngamargiang saserep, yan sampun sinah genah nia ngraris ngamargiang panegdeg.
7. Sang sapa sira ugi kramadesa Bukit Catu yan kerauhan tamiu praya masinutan malarapan antuk ngarorod, ugi mangda masadok miuningang ring prajuru desa, prajuru desa yoga maritetes, yan sangkaning tan patut pamargin rangkate, prajuru desa ngudukang mangda katur ring sang angawa rat, yan wenten mamurug denda gung artha manut pamutus pararem desa.

Pawos 17 :

1. Prade wenten anak lanang mobotin anak istri sane sami-sami durung maduwe rabi, tur sida kapariangken, prajuru patut ngutsahayang sang kalih majangkepan tur kaupacarayang sekadi patut olih sang lanang.
2. Prade sinalih tunggil tan tinut karangkatang, kadanda gung artha utawi danda beras akeh nyane 35kg manut perarem desa, saha wicaran nia katur ring sang angawa rat.
3. Yan silih sinunggil sampun maduwe rabi, wicaran nia katur ring sang angawa rat olih wirang nia tur keni denda 50 kg beras.

4. Yan anak istri mobot nenten wenten ngangkenin, patut kapuputang dumun ring kulawarga. Prade tan prasida antuk , mangdena wicara punika karauhang ring para manggala desa .
5. Yan wenten sinalih tunggil krama desa Bukit Catu ngambil anak istri antuk melegandang, memendet marikosa, miwah saluwir ipun sane tan nganutin sastra agama, tan yogya pimuput widi widana sadurung wenten pamutus saking guru wiseza, ikrama punika keni pamidanda 50 kg beras.
6. Yan anak istri saking desa pakraman Bukit Catu, merangkat ka dura desa ritatkala mapuputan maserah ka umah wirange istri patut keni punia gung artha manut perarem desa.
7. Yan anak istri saking desa pakraman Bukit Catu , ngarorod sareng anak lanang wedesa Bukit Catu, ritatkala pacang mapuputan maserah ka umah wirange istri patut keni punia gung artha/ beras 5 kg manut perarem desa.
8. Yan wenten sinalih tunggil krama desa Bukit Catu ngambil anak istri pinaka rabi tan manut sima drestha minakadi sastra agama(mengawini ibu , adiknya) yogya katur ring sang angawa rat mangda kabawosang , mangda polih pamutus. Punika keni pamidanda 50 kg beras tur mratistha desa.

PALET.2

INDIK BELAS MAKURENAN UTAWI NYAPIAN

Pawos 18 :

1.Sane kabawos nyapian, punika sang palas merabi, palas makurenan mawiwit wicara macihna tan tumus suka citaning panunggalan idep sang alaki rabi sane sampun katiwakang pamutus antuk guru wiseza saha kasobyahang ring sangkepan desa Bukit Catu.

2.Tata cara palas marabi :

Ha. Yan wenten sang sapa sira ugi madue oka istri sampun marabian, prade mantuk sangkaning ngambul, sajroning tigang sasih utawi 105 rahina, saking dina ngambule, matut matur supeksa ring prajuru desa.

Olih prajuru desa , wicarane kabawosin, tur kicen tatimbang mangda setata adung malih.

Na. Yan tatimbang prajuru nenten katinutin, wicaran nia dados kalanturang ring sang angawa rat pateh kadi tatimbang prajuru desane, sang mawicara kadanda manut pamutus pararem desa.

Ca. Yan wenten sinalih tunggil krama desa ngerangkatang sapian sadurung tigang sasih utawi 105 rahina saking dina palase, yogya sang ngerangkatang sapian punika keni danda gung artha manut pamutus perarem desa.

3. Krama desa sane belas marabi utawi makurenan, sasampun polih pamutus saking guru wisesa patut masadok miuningang ring kelian desa lan keliang banjar, mangda ka damiakang ring desa, ring banjar, sa kasep ipun asasih saking palase.

4. Yan wenten anak istri wit saking desa Bukit Catu nyapian Dura Nagara mawali ke Desania yogya sang madue wirang matur supeksa ring prajuru desa, saha mrayascita marisudha anake luh punika, yan ten ke parisuda antuk wirangnia, patut marisudha raga, mangda kesinanggeh nirmala.

PALET 3

INDIK BALU

1. Sane Kebaos Balu: Anak Istri katinggal seda rabine, yan anak lanang seda rabine, wiadin katinggal napian taler kewastanin balu.
2. Yan wenten Lanang Balu, keni payah – ayah lan pepeson asibak manut pararen desa minakadi.
3. Yan wenten Istri Baluluput payah – ayah.
4. Krama Lanang sane madue oka Istri, Balu Istri madue oka lanang sampun hates mayahan manut pangloktika prajuru desa, patut mayahan bulangkep, matata turun cumek bulangkep antuk pianak.
5. Munggwing wewanengan bebaluan luh utawi rangda,, ring indik wawarisan minakadi sane sios-siosan luwire ;

Ha. Miara tur muponin wewarisan sakantun pageh magenah ring rabine.

Na. Tan dados ngadol, ngadeang utawi makidihang wawarisan ring sang sapa sira ugi, sadurung polih palugrahan saking waris ka purusa.

Ca. Prade Balu sane pageh nganutin swadarman nia, raris katundung olih waris rabine balu inucap patut matur supeksa ring prajuru, prajuru patut mamawosin, ngicen tatimbang, yan tatimbang prajuru nenten katinutin sinalih tunggil dados ngelanturang wicarane ring sang angawa rat, prade pamutus sang angawa rat pateh ring tatimbang prajuru desane, sang ngaturang wicara ring sang angawa rat keni dandha manut pamutus pararem desa.

PALET 4

INDIK SENTANA.

PAWOS :

1. Prade pawiwahan tan ngawetuang sentana, kengin ngidih sentana antuk upasaksi sakala niskala sane kawastanin sentana paperasan.
2. Sajroning desa pakraman Bukit Catu ngarajegang pidabdab sentana kapurusa sidhi kara tunggal, paperasan tunggal dadia.
3. Yan wenten pakurnan tan mawidhi widhana ngawetuang sentana mangda sentana punika tan kawastanin babinjat utawi astra , yogya sentana punika kakukuhin antuk upacara paperasan.
4. Sang sapa sira ugi krama desa meras sentana, kasinangguh samput puput polah-pali krama, mawidhi widhana paperasan, kasaksinin antuk prajuru desa, kasiarang ring paruman, tur sampun wenten likita pamikukuh ring sang angawa rat.
5. Sane dados kaperas kaanggen sentana kadi ring sor puniki :

Ha. Anak sane magama Hindu.

Na. Papernahan nedunang saking waris kapurusa, tunggal dadia, tunggal sidhikara.

6. Indik meras sentana, sasampun puput upacara nia manut sastra agama Hindu, kalanturang ngareh likita ring guru wisesa.

PALET 5

INDIK WAWARISAN

PAWOS :

1. Warisan inggih punika : Tatamian, artha brana ayah-ayah ngupadi sukertha sekala- niskala saking kaluhurannia, arep ring taremania.
2. Lwire sane wenang kawarisin :
 - Ha. Hamong-amongan ring desa, ayah-ayahan saurah- arih.
 - Na. Hutang piutang sang ngawarisang.
 - Ca. Saraja duwe, brana, tegal, tatamian sakancan kasugahan.
3. Sane wenang ngawarisin :
 - Ha. Manut lalintih papernahan doh tampek saking purusa tunggal, sidhikara tunggal dadia.
 - Na. Putra dadaman () putra paperasan.
 - Ca. Sangkaning pitetes saking sang kawarisang maadue saluwir sane dados kawarisang, saking palugran guru wisesa, pinih akeh a pah teluan padruwean nyane ,maka piolih-olih paguna kayan.
4. Swadharmaning sang patut ngawarisin :
 - Ha. Nerima saha ngutsahayang tatamian pahan saking kaluhuranya, minakadi ngempon sanggah, pura dadia, saha panguhuranya nyeledinin ayah-ayahan pewaris.
 - Na. Ngabenang pewaris saha upakara-upakara selantur nyane.
 - Ca. Naurin hutang-hutang pewaris.
5. Sang sapa sira ugi krama desa Bukit Catu, yan tilar saking agama Hindu, tan yogya ngawaris sane kamulan patut warisin.

6. Ngudum wawarisan, kapatut sasampun puput kaabenang sang ngawarising brana kalih kasugian punika. Sane dados dum sajaba sane mangge pedagingan pangaci-aci, minakadi salwiring sane mangge piranti ngelaksanayang upacara agama muang selantur nyane.

7. Pah-pahan wawarisan kadi ring sor :

Ha. Sane lanang polih ategen.

Na. Sane istri polih asuhun, amung muponin kewanen.

SAPTAMAS SARGAH

WICARA LAN PAMIDANDA.

PALET 1

INDIK WICARA

PAWOS :

1. Salwiring wicara indik pakraman, ring wawidangan desa pakraman Bukit Catu, wenang rinawosan antuk prajuru desa, yan tan sida puput, prajuru desa ngaturang ring guru wiwesa, buat matetimbang.
2. Yan wenten wicara indik pakraman ring banjar, pemaksan, dadia, subak minakadi sekeha-sekeha tiosan, yogya kabawosang antuk prajuru soang-soang, yan tan kasidan puput wenang katengahang ka desa, prajuru desa yogya mawosin.
3. Indik nepasin wicara inucap, tan maren ngupadi dharma kawelas asihan tur malarapan antuk likita bhukti, saksi, saha tan maren mangda nepek ring sedaging awig-awig paswaran lan pamutus pararem desa.
4. Yan wicarane katiwakang antuk prajuru desatan katinutin utawi tan kairing antuk sang mawicara, wenang sang mawicara nunasang pangrawos ring sang patut mawosin/ ring guru wisesa.
5. Yan sang mawicara tan tinut ring pamutus wicara sane katiwakang inucap ring ajeng, prasida sang mawicara tan kalugra ngangge sapadruwen desa Bukit Catu, dosane mamedal ring desa.

PALET 2
INDIK PAMIDANDA

Pawos :

1. Luwiring pamidandha sane wenang katiwakang antuk prajuru desa, banjar, pemaksan, subak lan sekeha –sekeha sawewengkon desa pakraman Bukit Catu sakadi ring sor puniki :

Ha. Upasaksi, dewa saksi, pangrarata.

Na. Dandha pangangaskara lwire : mrayascita, marisudha miwar saha luwir ipun.

Ca. Nenten polih pelayanan sajroning administrasi, nenten dados maturan nyarengin desa, nenten dados ngangge fasilitas desa, banjar, nenten polih patedunan.

Ra. Pamidanda siosan manut palugrahan gueu wisesa.

2. Patiwak pamidanda, manut ungguhan wicarane soang-soang minakadi werat enteng wicarane inucap luwire :

Ha. Yan wicarane ring desa pakraman, yogya pamidandha antuk desa, mungging dedandan mantuk ka desa.

Na. Yan wicarane ring banjar pakraman, yogya pamidanda banjar ika, dadandan mantuk ka banjar.

3. Agung alit dadandan manut pangloktikan aagung alit werat enteng kasisipannyane sane mungging ring awig-awig gagaduhanya soang-soang minakadi paswara pinaka pamutus sangkepan wiadin paruman.

Pawos :

1. Rikala pawanengan naur dadosan, dadandan lan sapanunggilanya ring desaceled patut kapinggelang utawi katikelang.

2. Risampun keni danda nikel, sang keni danda dados penaurane nyicil.

3. Yan kantos panikel punika nenten prasidha antuk naur utawwi nyicil utangya, prasida keles pipil. Malih pidan prasida antik naur utangya wawu dados ngeranjing makrama desa.

SUKERTA TATA PALEMAHAN

PALET 1

1. Palemahan desa Bukit Catu, mahuger antuk tri mandala luwire :
Ha. Utama mandala : palemahan sane ka anggen karang pura wiadin parhyangan.
Na. Madya mandala : palemahan sane ka anggen karang pumahan, genah wewangunan sekadi : banjar, sekolah, kantor miwah sane siosan.
Ca. Nista mandala : palemahan sane ka anggen setra, margi, rurung, lorong , pangkung, miwah sane siosan. Sahanan palemahan sane wenten ring wawengkon desa pakraman Bukit Catu, yoga mangda maduwe babaledan wiadin wates sane pasti.
2. Sahanan palemahan punika, ugi mangda madue margi, rurung papundukan sane dados entasin manut loktika.
3. Yan wenten pakarangan pura, pumahan tegal bangket miwah palemahan kabebeng tan madue margi, rurung lan pundukan, sang madue patut ngatengahang babawose ka desa. Prajuru desa wenang nregteg, ngutsahayang mangda polih margi malarapan sangkaning sami suka.. Yan patut matumbas, manut pangargan tanah sane kamanggehang antuk sang angawa rat, sami kataur antuk sang mamuatang.
4. Yan desa pacang makarya margi/ ngalinggahang margi, rurung minakadi makarya margi, rurung desa, saking sampun ingkup paswaran desa kalih sang madue tanahe, yan nganggen tegal, bangkrt abyan miwah palemahan siosan wenang tan nawur pengargan tanah puniki, nanging yan madaging tatanduran, papayon, wawangunan salwire, desa patut ngicen prabeya agung alit manut pamutus parembug desa kala punika ten dados linggahan ring adepa agung.
5. Sang sapa sira ugi ngenahin karang tegehan, patut naku tegehe asukat natah dangsah, sane tebenan wenang mesunin tembok.
6. Telajakan karang patut katureksain antuk sang ngenahin karang punika soang-soang mangde kapikenoh tur kanten asri.

7. Yan wenten anak ngenahin palemahan sajeroning wawengkon palemahan desa pakraman Bukit Catu, tan tinut makrama desa, tan kalugra nganggen salwiring padruwen desa, tan kalugra ngelaksanayang panca yadnya ring sajeroning desa Bukit Catu, yan tekaning kapatian dados nyaubang utawi pendem ring setra teben, tan polih patedunan krama banjar utawi patedunan krama desa.
8. Yan wenten anak tan magama Hindu, ngenahin palemahan sajeroning desa Pakraman Bukit Catu, patut nganutin paswaran desa pakraman Bukit Catu.

PALET 2

INDIK KAKAYON

PAWOS :

1. Tan kalugra ngebah wit-witan saluir ipun ring palasan pategalan, abing, tangkid, miwah genahe siosan sane kakeker antuk desa, yan wenten sinalih tunggil mamurug, katiwakang danda manut pasuara tur taru sane karebah mantuk ka desa.
2. Yan wit-witan wiadin kakayon ngungkulin palemahan anak sios, sane ngawinang tiyeb, tampyas, ngarebedin, asing kaungkulin wenang ngtengahang ka desa, prajuru desa maritetes, saha mituduhang sang madue mangda ngrancap, nekteb wiadin ngarebah, yan kantos ping tiga pituduh desane tan kalingu, wenang katiwakin danda gung artha manut paswara, kakayon punika ; taru wiadin wit-witan punika karebah tur mantuk ka desa.
3. Yan wenten sinalih tunggil nyadia nandur pijer , turus , salwiring tanem tuwuh wyadin kakayonan sane pacang dados ageng, neseke ring babaiedan, ring wates papunduk, ugi mangda ka supeksa ring prsjuru desa miwah ring panyanding soang-soang, yan tan kalugra tan kasupeksaang, pradene sang mapurug katiwakin danda gung artha manut paswara, tur ngamademang tetandurane, (jarak matetanduran tane tuwuh inggih punika wantah adepa agui agung.

4. Indik pacang makarya babaledan utawi pagoan mangdene sang masandingan punika prasida tedun tur makaria baledan/ pagoan inucap.
5. Pamargin inggih punika : Saking pura puseh rauh ka grebenge. Raris ngalayang rauh ka Bukit juwet, raris ngadulayang rauh ring panangguntegal I Nengah Riasa dulune, lan pamargi ngelodang rauh ring pura dalem.
6. Yan sane kawastanin lorong, (gang) sane druwen desa inggih punika gang sane wenten ring delod umah I Ketut Danta.

PALET 3

INDIK WAWANGUNAN

Pawos :

1. Sang sapa sira ugi krama desa Bukit Catu, yan pacang ngawangun panyenger, karang paumahan, patut masupeksa ring panyandinge, yan tan adung patut nunas dedegan ring prajuru desa, prajuru desa negdeg sadu ajeng sang mawicara.
2. Wewangunan ring palemahan pecak tegal, bangket, palemahan suwung, sane sampun masanggah pawon, palemahan punika kabawos karang pumahan, dwaning sampun katiwang upakara karang. Awanan patut maduwe rung betel ka margi agung sukat mangda mresidayang ngalintang papaga, duaning tan kapatut ngalintang sawa ring tegal, bangket, yan wenten mamurug, yogya prajuru desa niwang tatepasan mangda sang mamurug mrayascita palemahan inucap sane kalintangin.
3. Yan wenten sinalih tunggil sang sapa sira ugi pacang ngawangun wewangunan genah ngelaksanayang upacara agama luwire : pura, ugi mangda wenten likita panugrahan prajuru desa, kalih likita palugrahan guru wisesa, yan wenten mamurug kadi inucap ring ajeng, kabawos tan sida karya, tan wenang anggen, tur wewangunan punika yogya wangdeyang.
4. Tan wenang ngungkulang capcapan wewangunan ka sajroning karang pumahan sewosan tan druwe, yan wenten mamurug, wenten ngatengahang ka desa, yogya prajuru desa negdeg, saha nyipat

ngentungin yan jati lintang sajroning selae rahina saking bebawose mangda sampun ka robah.

5. Tan wenang ngangge tembok umah wyadin tembok panyengker tan druwe, wenang kasambat sara antuk sang madruwe, wenang kasambat sara antuk sang madruwe, yan akas tur mamurug, sang kasambat sara, yogya katengahang ka desa, kabawos antuk desa.
6. Sang sapa sira ugi pacang mawangun nepi ring margi agung, nepi ring rurung desa, tan wenang ngecorang capcapan, tumpah ka margi inucap, yan mamurug katiwakin denda manut loktika.
7. Sang sapa sira ugi krama desa ngwangku karang paumahan, yogya urati miara ka asrian labuh pakarangannya ngelajur.

PALET 4

INDIK WEWALUNGAN

PAWOS

1. Sane kinucap wewalungan, sakancan buron suku pat sane nyadia ka piara sekadi : bawi, banteng, kambing, jaran miwah sapanunggilan ipun taler watek makampid sane nyadia kapiara sekadi : ayam, itik, angsa, dolong miwah sabacakan ipun.
2. Sang sapa sira ugi krama desa sane miara wewalungan suku pat sajaba asu, tan wenang ngalumar sane patut matlusuk, mangda katlusuk, sane tan patut matlusuk mangda mategul bawong, sane patut maglogor, makandang mangda maglogor wiadin makandang, mangda tan angrusakin, ngelethin palemahan tani druwe. Yan asu mangda mabelat luwire makalong bawong maka cihna wenten sane myara.
3. Sang sapa sira ugi krama desa myara watek suku kalih, watek makampid yatnain ugi mangda tan banget ngarusakin, ngaletihin, pumahan tetanduran druwen anak sios.
4. Tan wenang ngangonang ingon-ingon, ubuh-ubuhan ring palemahan tan druwe, minakadi tan sasakapan druwe, yan tan kaparisukaang sang madruwe palemahan, prajuru desa, pacalang desa, kelian-kelian asing

ngamanggihin wenang nyambat sara sang madue wewalungan ika, yan hakas sang kasambat sara wewalungan ika kataban, prajuru desa yogya niwakang pamidanda manut loktika gung artha manut paswara. Yan godel banteng dueung matlusuk miwah sabacakan ipun, durung antes mategul, tan wenang taban, yan tan ngajak inan ipun yogya rauhing ring sang madue.

5. Tan wenang medil, nulup minakadi salwiring pemargi pacang ngejuk paksi sane nenten mrana ring wawengkon desa pakraman Bukit Catu, yan wenten amurug katiwakin danda gung artha manut pamutus perarem desa.
6. Sang sapesira ugi ngarereh ulam ring tukade, ring telabahe, ring jelingjinge, miwah saungwaning ulam sajroning desa pakraman Bukit Catu, tan wenang nganggen tuba, setrum miwah salwir ipun, tan wenang nrusak empelan, nguukang tembuku, yan wenten mamurug, katiwakang dandha gung artha manut loktika saha paswaran desa, tur mahayu sane karusakang.
7. Agung alit dadandan punika ka unggahang sajroning paswaran desa Bukit Catu, nanging loktika juga wisesa.
8. Sakancan dadandan, dadosan sane munggah ring ajeng, sami mantuk ka desa pakraman Bukit Catu.